

歷代抗日英雄磨劍錄

第一章 明代抗日軼聞

1 名將戚繼光

明季倭寇蹂躪東南。破州縣衛所以百計。未有及府城者。有之自嘉靖四十一年陷我興化始。興化故名郡。最繁富。旣陷。遠近震動。詔急徵俞大猷充總兵官。戚繼光爲副。合兵往討。時劉顯由廣東赴援。以兵少壁城下。不敢戰。大猷至。亦不欲攻。以俟大軍之集。乃與顯別邀賊於長樂

。殲之。至是繼光先破倭於橫嶼。以浙江兵來會。巡撫譚綸令繼光將中軍。顯左。大猷右。合攻賊於平海。繼光先登。左右軍繼之。斬級二千二百有奇。還被擄者三千人。倭始遁去。遂復興化。其侵犯他州縣者。亦爲諸將所敗。倭起二十餘載。攻破城邑。殺傷官吏。下級軍官。不可勝計。轉漕增餉。宇內騷然。至此大創而去。東南半壁。甫得安枕。而繼光屢催大寇。（平浙閩之倭。又平江西之賊。）號稱名將。而其功更出劉顯俞大猷上。

嗣至隆慶元年。夏五月。給事中吳時來。以薊門多警。請

詔大猷及繼光。專訓邊卒。部議獨用繼光。乃命以都督同知總理薊州平昌保定三鎮練兵事。尋以薊州既有總兵官。及設總理。事權不一。復召還總兵官郭琥。而以繼光爲之。鎮守薊州永平山海諸處。繼光建敵臺千二百座。臺高五丈。睥睨四達。虛中爲三層。臺宿百人。鎧仗糗糧俱備。精堅雄壯。二千里聲勢連接。又立車營。每車一輛。用四人推換。戰則結方陣。而馬步軍處其中。製拒馬器。遏寇騎。寇至。則火器先發。稍近。則步軍持拒馬器。排列面前。間以長槍筴簄。(兵器名)寇奔。則騎兵逐北。又置輜

重營隨其後。而以南兵爲先鋒。（其時邊卒木彊。律以軍法。多不堪用。繼光請募浙人爲一軍。用倡勇敢。許之。浙兵三千。陣之郊外。天大雨。自朝至日昃。植立不敢動。邊卒大駭。自是始知軍令。）八衛兵主策應。本衛兵主戍守。節制精明。器械犀利。薊門軍容。遂爲諸邊冠。繼光有練兵實紀九卷。一練伍法。二練膽氣。三練耳目。四練手足。五六七八練營陣。營陣之中。又分場操。行營。野營。戰等法。九終於練將。其經營於練兵之策者。多至二百六十餘條。皆以爲練兵計也。且恐後世將兵者不復